



# ILIDŽA

**INFORMATIVNI BILTEN  
OPĆINE ILIDŽA**

**Ilidža • Juli-August 2018  
• Broj 173**





## Usvojen Izvještaj o finansijskom poslovanju JU KSR Hrasnica

Pred vijećnicima Općinskog vijeća bio je i Izvještaj o finansijskom poslovanju JU KSR Hrasnica za period 01.01-31.12.2017. godine, sa izvještajem revizora. U sklopu ove javne ustanove djeluje Centar za fizičku kulturu Hrasnica koji pruža usluge sportskim udruženjima, rekreativcima i ostalim subjektima za održavanje sportskih manifestacija. Zbog lošeg materijalnog stanja u JU KSR Hrasnica - Ilidža aktivnosti su ograničene. Centar uz velike napore obezbjeđuje optimalne uslove korisnicima za trening i takmičenja u kojim sudjeluju, a organizator je redovnih i tradicionalnih manifestacija. Trenutno u Centru fizičke kulture korisnici usluga sportskog centra su sportski kolektivi sa područja općine Ilidža: FK Famos, Škola fudbala "Fair Play", Klub invalida u sjedećoj odbojci "Oki Ilidža", Košarkaški klub "Igman", Bokserski klub "Ilidža", Karate klub "Fortis", Odbojkaški klub "Ilidža" i dr. Jedna od prvih značajnijih aktivnosti koje je JUKSR realizovao u ovoj godini bila je obnova košarkaškog terena, koji je nakon godina

zapuštanja i nebrige doveden u nefunkcionalno stanje. Dodatni značaj svemu daje i činjenica da su projekat prepoznali stanovnici lokalne zajednice koji su uvidjeli želju JUKSR-a da se igralište obnovi, ali i finansijske probleme s kojima se ova ustanova suočava, te zajednički realizovali. U objektu Doma kulture, koji djeluje u sklopu JU smješteno je više preduzeća i udruženja. Tako da pored JU KSR Hrasnica Ilidža, tu je sjedište Javnog preduzeća Ilidža kao i dvije produkcijske kuće. Od udruženja tu su Udruženje za planinski sport „Maraton“, kulturno umjetnička društva „Hrasnica“ i „Biseri Bjelašnice“, Ekološko udruženje „Aleja“, Vijeće mladih Općine Ilidža, Željezna generacija kao i fitness studio Daisy. Prostori su izdati pod zakup i nakon odluke o revidiranju ugovora svi redovno izmiruju svoje obaveze. Općinsko vijeće je prihvatilo Izvještaj uz zaključak da je neophodna izrada Strategije razvoja sporta, te da menadžment ove ustanove na osnovu idejnih projekata koje posjeduje općina Ilidža opredijeli se za prioritete.



## Vijećnici nosili majice "Pravda za Dženana"

Vijećnici Općinskog vijeća Ilidža 26. jula 2018. godine u Multifunkcionalnoj sali na 17. redovnoj sjednici obukli su majice s likom Dženana Memića. Od prisutnih 28 vijećnika svi su bili u majici "Pravda za Dženana", čime su dali podršku porodici Memić u borbi za istinu i

pravdu. Načelnik Općine Ilidža prof. dr. Senaid Memić, također je istakao podršku ovoj porodici koja prema njegovim riječima treba biti timska i institucionalna, te nikako tugu i borbu ove porodice koristiti i zloupotrijebiti u političke svrhe.



## REDOVNA SJEDNICA OPĆINSKOG VIJEĆA

## Donesena Odluka o usvajanju i provođenju RP "Pejton"

Općinsko vijeće Ilidža je na 17. sjednici donijelo Odluku o usvajanju i Odluku o provođenju Regulacionog plana „Pejton.“ Tom odlukom obuhvaćena je površina od 43 ha. U sklopu obuhvata definisane su zone mješovitog stanovanja, zaštitna područja prve i druge zaštitne zone izvorišta vode za piće, zona šetnice sa stambeno-poslovnim i sadržajima društvenog standarda-zona regulacije rijeke Željeznice.

Moguće je planirati i dječija igrališta sa mobilijarom, ali samo na zahtjev i uz saglasnost etažnih vlasnika stam-

benih objekata u neposrednoj blizini. Izradu RP "Pejton" je inicirala Općina Ilidža. Plan je izrađen na bazi ažurnih geodetskih podloga, a radi se u cilju preispitivanja prostornih mogućnosti za interpolaciju sadržaja društvene infrastrukture, kao i mogućnosti za novu gradnju, dogradnju, nadziđivanje i legalizaciju objekata, uz obezbijedenje neophodne infrastrukture. Sredstva za pripremu i izradu Plana obezbijedena su iz Budžeta Općine Ilidža.



### Informacije

Programom rada Općinskog vijeća Ilidža za 2018. godinu planirano je razmatranje funkcionisanja javnog gradskog saobraćaja na području općine Ilidža za 2017. godinu o kojoj je Vijeće raspravljalo. U informaciji je konstatovano da nema posebnih zamjerki na tramvajski saobraćaj, osim odstupanja od reda vožnje što dovodi do gomilanja vozila neposredno prije tramvajskog terminala. Najviše primjedbi upućeno je na saobraćaj autobusa i minibusova zbog ne poštivanja reda vožnje i velikog broja neobavljenih vožnji na linijama Ilidža-Hrasnica-Famos, Ilidža-Sokolović Kolonija, Ilidža-Kovači-Hrasnica, Ilidža-Butmir-Kotorac, Ilidža-Miševići, te Vijeće insistira da GRAS poboljša nivo usluga i poštuje utvrđeni red vožnje.

Pored ove Vijeće je primilo k znanju i informaciju o stanju komunalne čistoće na javnim površinama na području općine Ilidža sa osvrtom na stanje i potreban kapacitet kon-

tejnara po mjesnim zajednicama. Informacijom je obuhvaćena problematika čistoće na javnim površinama, nadležnosti, stanja i potrebnog kapaciteta kontejnera i sardnja sa KJKP "RAD".

Vijeće je primilo k znanju i Informaciju o realizaciji projekata neprofitnog socijalnog stanovanja na području općine Ilidža u kojoj je istaknuto da socijalno stanovanje podrazumijeva pružane pomoći u osiguravanju prihvatljivog načina stanovanja licima u stanju socijalne potrebe i dio je socijalne politike. Općina Ilidža je jedna od devet općina Kantona Sarajevo koja nakon reintegracije ima veliki broj raseljenih lica sa prebivalištem na području općine. Jedan dio njih vratio se u prijeratna prebivališta, dok je dobar dio njih ostao da boravi na Ilidži. Općina je u predhodnom periodu realizovala brojne projekte za zbrinjavanje ovih lica. Svi korisnici stambenih jedinica socijalnog stanovanja plaćaju najamninu koja ima ekonomsku, socijalnu i psihološku funkciju.



## Općina Ilidža dodijelila 67.000 KM proizvođačima malina

Na osnovu Zaključka Općinskog vijeća prihvaćena je inicijativa da se pomogne proizvođačima malina sa područja općine Ilidža, koji su pretrpjeli materijalne štete. Odlukom načelnika, a na prijedlog Službe za privredu i turizam odobrena su novčana sredstva za 71 uzgajivača maline i to 500 KM po dunumu. Za nadoknadu štete iz Budžeta Općine izdvojeno je oko 67.000 KM.

Načelnik Općine Ilidža prof. dr. Senaid Memić održao je 23. jula u Općini Ilidža sastanak sa proizvođačima malina i upoznao se sa problemima sa kojima su se susreli proizvođači malina.

Svakog proizvođača posjetili su predstavnici Općine, fotografisali i zapisnički konstatovali stanje na terenu.

„Zbog nedovoljne podrške viših nivoa vlasti, odnosno resornih ministarstava odlučili smo se mi da pomognemo proizvođače, da ne propadnu, zbog niskih otkupnih cijena i loših vremenskih uvjeta. Ovo je jednokratna pomoć da bi proizvođači opstali i ostali u proizvodnji malina, odnosno da ne bi zasadi bili iskrčeni. Napominjem da mi niti dajemo podsticaj niti

imamo nadležnosti, ali da država mora imati strategiju, plan i politiku u poljoprivredi” izjavio je načelnik Općine Ilidža prof. dr. Senaid Memić.

Proizvođač malina Ferid Kadić zahvalio je općini na pomoći.

„Visoke temperature, nedovoljna zaštita, na kraju vlažno vrijeme i niska cijena učinilo je da mnogo roda strada zbog truleži kojoj su ovo bili izuzetni uslovi za razvoj bolesti. Definitivno spasa nema ako država ne odvoji sredstva za naknadu štete” dodao je on.



## Dodijeljena sredstva za poticaj u razvoj poduzetničke inicijative mladih

Načelnik Općine Ilidža prof. dr. Senaid Memić 20. jula 2018. godine uručio je ugovore za finansiranje i sufinansiranje najboljih poslovnih planova sredstvima iz budžeta Općine namijenjenih razvoju poduzetničke inicijative mladih ljudi na području općine Ilidža.

„Čestitam vam i želim vam uspjeha u vašem radu. Trudite se i ne odustajte bez obzira na prepreke na koje ćete nailaziti u vašem radu. Neće vam biti lako, borite se jer samo vrijedni i uporni uspijevaju. Mi ćemo i dalje pomagati i podržavati mlade ljude u njihovim nastojanjima da sami riješe svoju egzistenciju“, kazao je načelnik Memić prilikom uručivanja ugovora.

Na osnovu javnog poziva i pravilnika odabrano je 11 najboljih poslovnih planova mladih za čije finansiranje su dodijeljena novčana sredstva u ukupnom iznosu od 38.900 KM. Sredstva su namijenjena za sufinansiranje troškova registracije, sredstava za rad, zakupa poslovnih prostora, obrtnih sredstava i ostalih troškova prilikom u svrhu registrovanja samostalnih djelatnosti i privrednih društava.

Sredstva su nepovratna i maksimalan iznos po poslovnom planu je 5.000 KM. Finasijska sredstva dobili su Elmir Fačić 5.000 KM, Adem Rovčanin 3.000 KM, Bakir Palavra 2.610 KM, Nedim Bećirspahić 5.000 KM, Džuneida Turkušić 2.610 KM, Muharem Čenanović 2.610 KM, Nejra Maljić 4850 KM, Tarik M Čenanović 2.610 KM, Tarik Ušanović Bijedić 5.000 KM, Tarik A Čenanović 2.610 KM i Elmedin Kapo 3.000 KM.





## Radovi na izgradnji kružnog toka u Sokolović- Koloniji

**N**a trasi saobraćajnice sa dva kolovoza i tramvajskim pojasom Ilidža-Hrasnica u toku su radovi na izgradnji kružnog toka u Sokolović- Koloniji na raskrsnici ulica Seada Bublina i Hrasničke ceste. Kružni tok je projektovan kao gradska dvotračna kružna raskrsnica vanjskog prečnika 50 metara, širine kružnog kolovoza devet metara i prelaznim (provoznim kolovozom širine dva metra. Ovakav rotor ima manji broj konfliktnih tačaka i bolji protok u odnosu na klasičnu četvorokraku raskrsnicu. Na rondou su predviđene pješačka i biciklistička staza promjenljive širine. Na potezu od Ilidže do Hrasnice predviđena je tramvajska pruga koja će prolaziti kroz rondo. Prema funkciji u gradskoj mreži ova saobraćajnica ima rang primarne saobraćajnice prvog reda i predstavlja nastavak glavne gradske magistrale koja se proteže od Marijin dvora do Energoinvesta, a sada i do Hrasnice.

Na kružnom toku trenutno se izvode radovi na zaštiti podzemnih instalacija, široki iskopi, te pripremni radovi na montaži cijevi za odvodnju oborinskih voda. Izvođač radova po projektu koji je uradio TZI Inženjering je Mevludin Comerc, a nadzor vrši Zavod za izgradnju Kantona Sarajevo. Vrijednost radova je 627.114 KM koje finansira Općina Ilidža.



## U toku rekonstrukcija 11 ulica

**O**pćina Ilidža je iz budžeta izdvojila 462.515 KM za rekonstrukciju 11 ulica.

Asfaltirana je ulica Kovačevac u MZ Blažuj, u dužini 355 a širini četiri metra. Investitor je Općina Ilidža, a izvođač radova je GP ing d.o.o. Vrijednost radova je 39.594,11 KM.

Radovi rekonstrukcije su završeni u ulici Ribnjača u MZ Hrasnica II, u dužini 200 a širini tri metra. Radove finansira Općina Ilidža, izvođač je firma Braća Mujić d.o.o., a iznose 42.331,00 KM. Okončana je rekonstrukcija i ulice Briješčanska u MZ Stup, u dužini 300 a širini pet metara. Radove izvode radnici firme Braća Mujić d.o.o., a finansira ih Općina Ilidža. Vrijednost investicije je 60.000,00 KM.

U toku su radovi u ulici Dr. Munira Gavrankapetanovića u MZ Stupsko brdo. Dužina koja se radi je 395 metara, a širina četiri i po. Investitor je Općina Ilidža. Izvođač radova je Ado-trans d.o.o. Visoko. Vrijednost je 187.952,98 KM. Novi asfalt dobili su i stanovnici ulice Kasindolska cesta 95-105, MZ Stup II u dužini 195 i širini

tri metra. Radovi u iznosu 19.600,00 KM su povjereni konzorciju firmi OXA d.o.o i Demus d.o.o., a plaća ih Općina Ilidža. Radovi asfaltiranja okončani su i ulici Šamin gaj u MZ Rakovica. Dužina je 84, a širina četiri metra. Investitor je Općina Ilidža, izvodila ih je firma GP ing d.o.o., a vrijednost 8.147,76 KM. U toku su i radovi asfaltiranja u saradnji sa građanima i to u omjeru 70 Općina, a građani 30 posto. Završeno je asfaltiranje ulice Zenički potok, dionica od mosta, u MZ Rakovica, u dužini 204, te širini četiri metra.



Vrijednost radova je 15.899,81 KM, a investiciju su finansirali Općina Ilidža 70 i građani 30 posto. Izvođač radova je konzorcij firmi OXA d.o.o i Demus d.o.o. U toku je asfaltiranje ulice Poligonska 174 u MZ Butmir u dužina: 165 i širini tri i po metra. Investitor je Općina Ilidža (omjer 70 i građani 30 posto). Izvođač radova: GP ing d.o.o., a

vrijednost radova je 13.172,68 KM. U toku su radovi asfaltiranja ul. Stanjevac 87-105, (MZ Rakovica u dužini 234 a širini tri i po metra. Radove finansira Općina Ilidža 70 i građani 30 posto. Izvođač radova je GP ing d.o.o., a vrijednost je 19.350,86 KM. Asfaltira se i ulica ul. Luke 34-44, MZ Stup u dužini 196 i širini četiri metra. Investitor je Općina Ilidža 70 i građani 30 posto. Izvođač radova: GP ing d.o.o. Vrijednost radova: 18.274,82 KM. U toku su radovi asfaltiranja ulice Rogaćići 8-43, MZ Blažuj. Dužina je 300 a širina četiri metra. Radove u iznosu 38.196,99 KM Općina Ilidža povjerila je firmi GP ing d.o.o. Građani su učestvovali 30 posto.



# Za asfaltiranje ulica 834.099, 69 KM

**N**a području općine Ilidža u toku je asfaltiranje 19 ulica. Za te namjene izdvojeno je 834.099, 69 KM.

Završeno je asfaltiranje ulice Mitrići u MZ Vrelo Bosne, u dužini 710 i širini četiri metra.

Investitor je Općina Ilidža. Izvođač radova je firma Braća Mujić d.o.o., a vrijednost je bila 76.090,99 KM. U toku je rekonstrukcija ulice Mithata Hujdura Hujke u MZ Ilidža Centar, u dužini 205 i širini četiri i po metra. Radovi su povjereni firmi Braća Mujić d.o.o., a iz Budžeta Općine Ilidža izdvojeno je 36.317,50 KM.

Novi asfalt dobit će stanovnici ulice Uglješe Uzelca od br. 31 do br. 57 u MZ Stup. Dužina koja se radi je 120 a širina tri metra. Investiciju finansira Općina Ilidža u iznosu 15.179,23 KM, a radi firma Braća Mujić d.o.o.

U toku je rekonstrukcija i ulice Bajre Kaljanca u MZ Sokolović-Kolonija u dužini 250 i širini četiri i po metra. Općina Ilidža je za ove radove izabrala firmu GP ING d.o.o., a vrijednost radova iznosi 118.170,00 KM. U toku je i rekonstrukcija ulice Put Famosa (MZ Hrasnica I) u dužini 370 i širini sedam metara. Investitor je Ministarstvo privrede KS, a izvođač je firma Bosman d.o.o. Vrijednost radova iznosi 185.635,94 KM.

U toku je i asfaltiranje 14 ulica u saradnji sa građanima i to u omjeru 70 posto, a građani 30 posto.

Asfaltiranje ulice Zenički potok u MZ Rakovica je u toku u dužini 402, a širini tri metra.

Investitor je Općina Ilidža u omjeru 70 posto i građani 30. Izvođač radova povjeren je konzorciju firmi OXA d.o.o i Demus d.o.o. Vrijednost radova: 44.647,15 KM. U toku je asfaltiranje ulice Buhotine u MZ Rakovica, u dužini 458 i širini tri metra. Investitor je Općina Ilidža 70 i građani 30 posto. Izvođač radova: konzorcij firmi OXA d.o.o i Demus d.o.o. Vrijednost radova: 46.178,39 KM. U toku je asfaltiranje ulice Vlakovo do br. 48 MZ Blažuj. Dužina koja se asfaltira je 72 metra i širina tri metra. Radovi su povjereni konzorciju firmi OXA d.o.o i Demus d.o.o., a iznose 6.710,00 KM.

U toku je asfaltiranje ulice Kovačevac 135-145 u MZ Blažuj, u dužini 176 metara, a širini tri i po metra. Investitor: Općina Ilidža 70 i građani 30 posto. Izvođač radova: konzorcij firmi OXA d.o.o i Demus d.o.o. Vrijednost radova: 18.509,19 KM.

Asfaltiranje ul. Kobiljača 32C u MZ Rakovica, također je u toku u dužini 380 i širini dva i po metra. Radove izvodi konzorcij firmi OXA d.o.o i Demus d.o.o., a iznose 29.251,69 KM. Okončani su radovi asfaltiranja ulice Butmirskog bataljona 12 u MZ Butmir u dužini 95 metara i širini tri metra. Investitor je Općina Ilidža 70 i građani 30 posto. Izvođač radova, konzorcij firmi OXA d.o.o i Demus d.o.o. Vrijednost radova iznosi 8.252,00 KM. U toku su radovi



asfaltiranja ulice Kakrinjski put-Zeleni ariš u MZ Rakovica. Dužina koja se asfaltira je 400, a širina tri metra. Izvođač radova, konzorcij firmi OXA d.o.o i Demus d.o.o. Vrijednost radova: 39.915,73 KM

Završeni su radovi asfaltiranja ulice Vreoca 5-13 u MZ Vreoca, u dužini 176, a širini tri metra.

Radove vrše radnici konzorcij firmi OXA d.o.o i Demus d.o.o., a vrijednost radova je 17.236,43 KM.

Završeno je asfaltiranje ulice Igmanska cesta 17P u MZ Hrasnica II. Dužina 64 metra, širina četiri metra. Radove su izvodili radnici firme GP ING d.o.o., a vrijednost je 6.984,43 KM KM.

Završeno je asfaltiranje ulice Butmirskog bataljona 18-22 u MZ Butmir. Dužina koja je urađena je 45, a širina tri i po metra. Izvođač radova: GP ING d.o.o. Vrijednost radova: 4.901,72 KM

U toku su radovi asfaltiranja ulice Karamušići 10-14 u MZ Osjek u dužini 55, a širini četiri metra. Vrijednost radova iznosi 5.712,00 KM, izvode ih radnici GP ING d.o.o. U toku su radovi i u ulici Hendekuša 161 u MZ Osjek u dužini 155 metara i širini tri metra. Izvođač radova: GP ING d.o.o. Vrijednost radova: 13.293,31 KM. U toku je asfaltiranje i ulice Hendekuša 43 u MZ Osjek, u dužini 102, širini tri metra. Radovi su povjereni GP ING d.o.o, a vrijednost iznosi 8.151,04 KM. Asfaltiranje ulice Mehe Porobića 56 u MZ Stup, završeno je u dužini 241, a širini tri metra.

Radove su obavljali radnici GP ING d.o.o., koštali su 18.894,33 KM.

Završeno je asfaltiranje ulice Osik 807 u MZ Osjek, u dužini 57, širini tri metra. Izvođač radova je GP ING d.o.o. Vrijednost radova je 5.131,27 KM

Asfaltiranje ulice Drage Filipovića, MZ Osjek je u toku. Dužina koja se radi je 80 metara, širina tri metra. Investitor je Općina Ilidža u omjeru 70 i građani 30 posto. Izvođač radova GP ING d.o.o. Vrijednost radova je 6.640,22 KM. Asfaltiranje ulice Plantaže u MZ Blažuj, u dužini 202 metara, širini tri i po metra je završeno. Izvođač radova: GP ING d.o.o. Vrijednost radova: 18.405,39 KM

Završeno je i asfaltiranje ul. Mehe Porobića 23, MZ Stup. Dužina urađene ceste je 100 metara

Širina tri i po metra. Izvođač radova: GP ING d.o.o. Vrijednost radova: 8.513,51 KM. Asfaltirana je i ulica Trešnje 19-69, MZ Stup. Dužina: 424 metra, širina tri i po metra. Radove su izvodili GP ING d.o.o., a iznosili su 41.726,36 KM. Asfaltiranje i ulice Gornje Vlakovo u MZ Blažuj okončano je. Dužina urađene ceste je 508 metara, širina tri metra. Investitor je Općina Ilidža u omjeru 70 posto i građani 30 posto. Izvođač radova: GP ING d.o.o. Vrijednost radova 53.651,87 KM.





## Adresni registar privodi se kraju

**P**rojekt adresnog registra na području općine Ilidža privodi se kraju. Ovim registrom Općina Ilidža će dobiti kvalitetne podatke koji će biti uvezani sa sistemom katastar.ba, gdje će biti evidentirane adrese sa kućnim brojevima.

Federalna uprava za geodetske i imovinsko-pravne poslove sa potpisivanjem Ugovora o zajedničkim obavezama pri uspostavi i održavanju podataka adresnog registra na području općine Ilidža obavezala se da će putem sredstava projekta "Izgradnja kapaciteta za unaprijeđenje zemljišne administracije i procedura u BiH" izvršiti instalaciju softvera za održavanje podataka adresnog registra. U Općini Ilidža je 13. augusta održan sastanak na kojem su se radile pripreme za operativni plan kako bi se uspostavili i održavali podatci adresnog registra, koji će se provoditi kroz dvije faze.

Pripremna faza obuhvata prikupljanje postojeće dokumentacije koja se odnosi na granice naseljenih mjesta, nazive ulica i izrada plana podjela na ulice i trgove za sva naseljena mjesta. Faza implementacije obuhvata provjeru postojeće evidencije, stanja na terenu, instalacija aplikacija, održavanje obuke za osobe koje će raditi na projektu, konverzija podataka u softver za navedeni registar i unos podataka (kućnih brojeva u aplikaciji za adresni registar).



## Završeni radovi na deminiranju lokaliteta Zoranovići

**U**Mjesnoj zajednici Hrasnica I, 12. oktobra 2017. godine počeli su radovi na deminiranju lokaliteta Zoranovići kojim je obuhvaćeno područje u površini od tri miliona kvadratnih metara, što je najveći poslijeratni projekat ove vrste u Bosni i Hercegovini. Projekat deminiranja u vrijednosti od 300.000 KM koji je finansirala Općina Ilidža uspješno je završen 10. jula 2018. godine. Operacijom deminiranja obuhvaćeno je 16 lokacija i to: Pogledalo, Jasen, Lovačka Okuka, Prosječena stijena, Mandino vrelo, Šmrđelj, Stožje, Adžine dole, Litica, Brezova glava, Rošća, Vidovac 1, Vidovac, Gušća, Vijerča i Krupac. Tokom deminiranja pronađen je 106 protupješađijskih mina, 63 neeksplozivna ubojna sredstava (granate, ručne bombe i sl.), jedna automatska puška i jedan raketni bacač i sve je uništeno u skladu sa propisima. Izvođač radova je bilo Udruženje „Centar za obuku pasa za otkrivanje mina“ iz Sarajeva.

## Uskoro novi most kod OBI-ja

**U**naselju Pejton, u toku je gradnja novog pješačkog mosta preko rijeke Željeznice. Rok za izgradnju mosta je 12 mjeseci. Vrijednost radova iznosi 1.379.823,15 KM, a na konkursu za izvođača radova je izabrana firma "Porobić" iz Zavidovića, dok je podizvođač firma "Pont d.o.o".

Riječ je o pješačkom mostu koji je namijenjen povezivanju dviju obala, tačnije jednog dijela Ilidže i industrijske zone. Iako u blizini postoji most za pješake i vozila, on godinama nije pogodan za građane koji žele pristupiti industrijskoj zoni. Dužina mosta je 92,65 metara. Nadzor je povjeren firmi In d.o.o.





ILIDŽANSKA SCENA PONOVO BILA SPOJ MLADOSTI I ISKUSTVA

# Nikolina Kovač pobjednica Festivala “Ilidža 2018”



Ilidžanska ljetna pozornica bila je premala da primi sve poštovaoce muzike koja je odzvanjala tih noći 18.19. i 21. jula. Scena je ponovo bila spoj mladosti i iskustva, pjesama koje vraćaju sjetu na prošla vremena, ali i onih koje su nagovještavale neka nova.

Na Ljetnoj pozornici na Ilidži 18. jula 2018. započeo je Festival narodne muzike “Ilidža 2018” takmičenjem harmonikaša koji su se natjecali za nagradu “Prva harmonika”. Odlukom žirija “Prva harmonika” je Lazar Pušić iz Banja Luke. Drugo mjesto je pripalo Darku Mrdiću iz Mokrog, a treće Harunu Horiću iz Zenice. Majstorske izvedbe ocjenjivao je stručni žiri - Elvidin Edo Krilić, Slobodan Vidović, Dinko Mujanović i Dragan Stojković Bosanac. Proglašenjem pobjednika i učesćem 16 izvođača 19. jula 2018. godine završena je druga, takmičarska večer Festivala narodne muzike Ilidža 2018, koji ove godine je proslavila 55. rođendan. “Kako da te zaboravim” autora Mirka Šenkovskog Geronima koju je otpjevala Nikolina Kovač pobjednica je Festivala “Ilidža 2018”. Najbolji izvođač je Mensura Bajraktarević koja je otpjevala pjesmu “Ljetne noći”, “Ljubav stara” nagrađena je za najbolji tekst, a napisao ju je rahmetli Mensur Mrehić.

Nagradu za najbolji aranžman osvojila je pjesma “Ljetne noći” Mirze Balića. Nagradu publike osvojio je Dino Memić sa pjesmom “Stara smokva”, a autor teksta i muzike Dženan Jahić je dobio nagradu za najbolju muziku.

Pobjednik će dobiti novčanu nagradu od 5.000 KM, a ostali nagrađeni će dobiti po 1.500 KM.

U “Večeri velikana” nastupili su Haris Džinović Enes Begović, Šerif Konjević, Hanka Paldum, Elvira Rahić, Merima Njegomir, Asim Brkan, Ferid Avdić, Branka Sovrlić, Slađa Mandić...

Organizator Festivala narodne muzike “Ilidža 2018” je Općina Ilidža, a medijski pokrovitelj Hayat TV.









## Održan Drugi Ilidža Rock festival

Na Ljetnoj pozornici 10. avgusta je održan Drugi Ilidža Rock Fest na kojem su bili okupljeni ljubitelji rocka, a zabavljalo ih je nekoliko bendova.

Prošle godine su na Ljetnoj pozornici nastupili bendovi S.P.U.K, PNA, Mustang, Pro Rocks, Lokomotiva, Lijepi brener, kao i Gordan Dizdarević Grk te Muris Varajić, a svirku je održao i poznati sarajevski bend Konvoj, dok su se ove godine predstavili bendovi Pank Floyd i Dum Dum (oba iz Sarajeva) te Domino efekt (Brčko). Najveće ime bio je popularni bend Nervozni poštar koji je svojim hitovima, među kojima su "Mi smo drvosječe", "Ženim se" i "Salko dinamitaš", zabavljao prisutnu publiku. Organizatori su i ovog puta zadovoljni festivalom koji će postati tradicija u narednim godinama.



## Održan Deveti međunarodni dječiji festival folklor

U periodu od 26. do 30. jula 2018. godine, Ilidža i Sarajevo su bili domaćini i kulturna prijestolnica dječijeg folklornog stvaralaštva iz devet zemalja. Udruženje za djecu i mlade "Nominativ" Ilidža, uspješno je organizovao deveti po redu Međunarodni dječiji festival folklor. Na festivalu je učestvovalo više od 500 mališana iz Bugarske, Grčke, Hrvatske, Mađarske, Slovačke, Španije, Turske i Bosne i Hercegovine. Cilj festivala je okupiti što više djece na jednom mjestu, pod istim krovom i sa istim motom, a to je očuvanje tradicije, razvijanje prijateljstva, kulturnog i socijalnog duha, širenje ljubavi, tolerancije i mira među djecom.

Građani općine Ilidža, kao i svi građani Kantona Sarajevo na ljetnoj pozornici mogli su uživati gledajući nošnje i igre.

Pored festivalskog programa, učesnici iz svih zemalja položili su cvijeće na spomenik ubijenoj djeci opkoljenog Sarajeva 1992-1995., obišli su Vrelo Bosne, Ilidžu, olimpijsku planinu Igman, Bašaršiju i sve značajne kulturno-historijske znamenitosti općine Ilidža, kao i Kantona Sarajevo u cjelini. Veliku podršku u realizaciji festivala dala je Općina Ilidža na čelu sa načelnikom Senaidom Memićem.



## Prijem za učesnike Devetog međunarodnog festivala folklor

Načelnik Općine Ilidža prof. dr. Senaid Memić 27. jula 2017. godine upriličio je prijem za učesnike Devetog međunarodnog festivala folkora za djecu, (djeca uzrasta od 8 do 15 godina). Festival se održao u periodu od 27. jula do 30. jula na Ilidži, a nastupili su ansamblji iz Bugarske, Grčke, Hrvatske, Mađarske, Rusije, Slovačke, Španije, Turske i Bosne i Hercegovine sa 300 učesnika. Domaćin festivala je Udruženje za djecu i mlade „Nominativ“.

„Čast mi je i zadovoljstvo biti domaćin festivala folklor za djecu sa ovolikim brojem zemalja učesnica. Ilidža postaje centar folkora u regionu. Nadam se da će publika na Ilidži uživati u vašim igrama. Želim vam ugodan boravak u našoj općine i uživajte u njenim ljepotama, družite se, razvijajte prijateljstvo, mir i toleranciju i dođite nam i sljedeće godine“, kazao je načelnik Memić u svom obraćanju učesnicima festivala.

Gosti nisu krili svoje zadovoljstvo učešćem na festivalu, a posebno su zadivljeni ljepotom Ilidže i Bosne i Hercegovine. Gosti i domaćini razmijenili su poklone, kao znak pažnje i sjećanja na ovaj susret.





## Treći međunarodni festival folklora za djecu "Čuvari tradicije"

U periodu od 09. do 13. augusta 2018. godine održan je Treći međunarodni festival folklora za djecu i mlade „Čuvari tradicije“. Na ovogodišnjem festivalu predstavilo se više od 1.000 učesnika iz devet zemalja: Turske, Kirgistan, Albanije, Crne Gore, Hrvatske, Slovačke, Srbije, Rumunije, BiH. Učesnici su svoju raskošnu tradiciju predstavili kroz četiri koncerta koji su se održavali na Ilidži, Zenici, Jajcu i Mostaru.

„Ovim projektom smo ojačali međunarodnu saradnju, otvorili vrata i puteve za uzvratne posjete, što je i jedan od ciljeva kada je ovaj festival u pitanju. Ostvareni su i dodatni ciljevi projekta kao što su: očuvanje tradicije i drugih vrijednosti i potencijala naše domovine i zemalja učesnica, a razvili smo nova prijateljstva među učesnicima i stvorili neraskidiv lanac prijateljstva, mira i tolerancije za budućnost. Svemu tome doprinijeli su oni bez kojih ovaj festival ne bi sijao tako velikim sjajem a to su Općini Ilidža, Ministarstvu kulture i sporta Kantona Sarajevo i Federalnom ministarstvu kulture i sporta koji su finansijski podržali ovaj projekat, stoga im se najsrdačnije zahvaljujem u lično ime i ime svih učesnika“, kazao nam je Džemo Hurić, direktor Festivala folkora.



## Učenci iz Njemačke posjetili Općinu Ilidža

Učenci, njih sedam i dva profesora iz škole Stadtteilshule Stellingen iz Hamburga iz Njemačke koji su gosti Četvrtne gimnazije Ilidža, a u okviru razmjene učenika, 27. avgusta posjetili su Općinu Ilidža. Domaćin njihove posjete bio je načelnika prof. dr. Senaid Memić sa saradnicima koji ih je pozdravio, zaželio im dobrodošlicu, ugodan boravak i ukratko ih upoznao sa osnovnim podacima o Općini. Goste iz Njemačke i njihove domaće učeničke i profesorske iz Četvrtne gimnazije posebno su zanimali aktivnosti mladih Općine iz oblasti obrazovanja, kulture i sporta sa čime ih je upoznao Denis Muhović, pomoćnika načelnika za obrazovanje, sport, kulturu i informisanje.




## Izabrana najljepša dvorišta i balkoni Ilidže

Općina Ilidža je i ove, kao i prethodnih godina, organizovala izbor najljepšeg dvorišta i balkona sa cvjetnim aranžmanom, a s ciljem očuvanja tradicije ilidžanskih bašti, ali i podizanja svijesti građana o značaju očuvanja životne sredine i poboljšanja turističke ponude. Na raspisani javni poziv prijavilo se 25 aplikacija koje je komisija za izbor obišla i odabrala najbolje, kojima je načelnik Općine prof. dr. Senaid Memić uručio nagrade.

„Nismo mi vas nagradili, vi ste nas nagradili ovom ljepotom, koja oplemenjuje i stvara ugodaj za oči i dušu. Nastavite da uređujete i njegujete vaša dvorišta i balkone“, kazao je načelnik Memić.

Za najljepše dvorište prva nagrada pripala je Redži Jašareviću iz Butmira, drugo mjesto osvojila je Sabina Salihović iz Osjeka, a treće Rabija Šualija iz Sokolović-Kolonije. Najljepši balkon sa cvjetnim aranžmanom je Asima Mešića iz Otesa, dok je drugo mjesto pripalo Mejri Fajić iz Butmira, a treće Vlajku Andriću iz Ilidže. Za sve njih Općina Ilidža obezbjedila je novčane nagrade, i to u kategoriji najljepšeg dvorišta za prvo mjesto 500, drugo 400 i treće 300 KM. Za najljepši balkon prva nagrada iznosi 300, druga 200 i treća 100 KM.





## Marš mira Ilidža-Nezuk-Srebrenica

Godinska služba spašavanja i Streljački klub Ilidža u saradnji i pod pokroviteljstvom Općine Ilidža, sedmu godinu zaredom organizovali su Marš mira Ilidža-Nezuk-Srebrenica. Ovogodišnji učesnici, njih 55 krenuli su autobusom do Nezuka ispred zgrade Općine 7. jula 2018. godine. Sretan put i dobro zdravlje na ispraćaju zaželio im je načelnik Općine prof. dr. Senaid Memić sa saradnicima. Sudionici marša su se u Nezuku pridružili ostalim učesnicima marša odakle su nastavili put prema Memorijalnom centru u Potočarima, gdje su 11. jula prisustvovali kolektivnom ukopu i dženazi žrtvama genocida.



## Sedmi moto maraton Srebrenica 2018

Moto klub „Suburb’s Riders“ Ilidža organizovao je i ove godine sedmi po redu Internacionalni moto maraton Srebrenica 2018. pod nazivom „Da se ne zaboravi i ne ponovi“ posvećen godišnjici srebreničke tragedije. Učešće je uzelo više od 600 motorista iz Bosne i Hercegovine, Hrvatske, Slovenije, Švedske, Austrije, Švicarske, Njemačke, Turske, Libije i Italije koji su se 10. jula 2018. godine okupili na parkingu ispred Energoinvesta na Ilidži, gdje je obavljeno akreditiranje učesnika, podjela majica i lunch paketa, nakon čega su u pratnji policije krenuli na defile kroz grad, gdje su se zaustavili i položili cvijeće na spomen obilježje Djeca Sarajeva, a zatim su krenuli prema Memorijalnom centru Potočari. Na putu prema Srebrenici zaustavili su se u Kladnju, Vlasenici, te Konjević-Polju gdje su obišli nanu Fatu Orlović. Učesnici moto maratona su 11. jula prisustvovali dženazi i obilježavanju 23. godišnjice genocida u Srebrenici. I ove, kao i predhodne godine Općina Ilidža finansijski je podržala ovu humanu manifestaciju.



## Obilježena godišnjica stradanja djece u parku u Hrasnici

U parku u Hrasnici u organizaciji Udruženja logoraša Ilidža, 12. jula 2018. godine, roditelji, rodbina, prijatelji, vršnjaci, delegacije Općine Ilidža, predstavnici udruženja roditelja ubijene djece opkoljenog Sarajeva 1992-1995. godina, logoraša Općine Ilidža, polaganjem cvijeća ispred spomen obilježja, učenjem Fatihe, minutom šutnje odali su počast ubijenoj djeci.

Prije 26 godina 12. jula 1992. godine, tačno u 14,50 sati, granata ispaljena sa agresorskih položaja iz pravca Vojkovića usmrtila je četvoro nevinih mališana u parku u Hrasnici. Tog dana zauvijek su prestala da kucaju srca nevinih mališana Azmira Bradarca, Sanele Hadžiomerović, Aldine i Admira Čolpe.

„Teško je govoriti na ovom mjestu i ovakvim tužnim povodom kako bismo sačuvali sjećanje na

ovu djecu koja su u rijetkim momentima igre zvjerski ubijena. Zato vas molim da se svake godine okupljamao na ovaj dan kako bi se sjetili ovog tragičnog događaja,“ kazao je predsjednik Udruženja roditelja ubijene djece opkoljenog Sarajeva „92-95“ Fikret Grabovica.





## Obilježeno 26 godina Četvrte viteške brigade

Četvrta viteška brigada 27. jula proslavila je 26 godina od formiranja. U okviru obilježavanja ove značajne godišnjice brigade, koja je tokom rata čuvala Hrasnicu, Sokolović-Koloniju i Butmir, odnosno slobodne teritorije Ilidže i područje Igmana, a time i kapiju Sarajeva, ispred Općine Ilidža je otkriveno spomen-obilježje borcima ove brigade.

“Spomenik je jedinstven za ovo područje i nešto je što treba da bude stalno podsjećanje na ulogu i ratni put Četvrte viteške motorizovane brigade te ujedno i sjećanje na sve šehide i poginule borce s područja općine Ilidža. Teritorija koju je ova brigada držala na početku rata nije se smanjila ni pedlja, samo je proširena, a jedinica je učestvovala u velikom broju operacija od Ilidže, pa do Krajine, i predstavlja nepobitnu historijsku činjenicu u odbrani slobodnih ilidžanskih prostora, tada jedinog spoja glavnog grada sa ostatkom države”, izjavio je Emir Redžović, predsjednik Udruženja Četvrta viteška motorizovana brigada. Prema njegovim riječima kroz brigadu prošlo više od 6.500 boraca, 33 ih je nagrađeno najvećim ratnim priznanjem Zlatni ljiljan, a 425 ih je dalo živote za odbranu domovine.

Potom je održana svečana sjednica Općinskog vijeća. Načelnik Općine Ilidža prof. dr. Senaid Memić osvrnuo se na značaj Četvrte viteške brigade, rekavši da treba stalno svjedočiti istinu o dešavanjima u proteklom ratu, tražiti zločince da odgovaraju, i stalno se boriti za državu BiH. “Budimo kao ljudi koji su ušli i postrojili se u Četvrtu vitešku, a pri tome znali da su slabiji ali se nisu nikad predavali”, naglasio je načelnik Memić.

Emir Redžović predsjednik Udruženja Četvrta viteška motorizovana brigada u svom obraćanju zapitao se danas sa vremenske distance od 23 godine, ko su sad oni?

“Heroji, ratnici, legende? Ako i jesmo to smo postali silom prilika. Naš cilj je bio pobijediti u početku superiornijeg i bolje naoružanog neprijatelja. Nismo željeli naša imena uklesana u kamen, niti pjesme o nama, samo smo željeli stići do konačne pobjede. Dovoljno je samo pogledati oko sebe i vidjeti rezultate naše borbe, koliko god se neprijatelji trudili uvjeriti nas u suprotno“, rekao je Redžović, te dodao da Brigada ima iza sebe krvavu prošlost punu rana, ali da će nastaviti njegovati kulturu sjećanja.

“Moramo konstantno imati na umu da zlo ima inteligenciju, naum i nakanu. Zlo nije stihija, upamtite ali neka i zlo upamtiti da će pripadnici Četvrte viteške brigade zajedno sa narodom Ilidže, čvrsto stajati na bedemu naših vjekovnih ognjišta, čuvajući i braneći ih. Ovaj komad naše države neprijateljska čizma nikada neće osvojiti niti pokoriti,” poručio je Redžović.

Na Ljetnoj pozornici 27. jula u 20 sati održan je koncert duhovne muzike “Vječnost je njihova.”



## Obilježena 26. godišnjica “Bitke na Famos”

U naselju Lasica u Hrasnici 4. augusta 2018. godine obilježena je 26. godišnjica “Bitke za Famos” u kojoj je poginulo 27 pripadnika 104. motorizovane brigade Armije RBiH. Delegacije Općine Ilidža, Udruženja 104. Viteške brigade, članovi porodica šehida i poginulih boraca položile su cvijeće kod spomen-ploče u Lasnici i ispred spomen-obilježja u Hrasnici. Bitka za Famos je jedna od najvažnijih bitaka koje su se desile 1992. godine. Predsjedavajući Općinskog vijeća Ilidža Muhamed Omerović u svom obraćanju istakao je da poginuli heroji nikada ne smiju biti zaboravljeni.

“Bitka za Famos je jedna od najznačajnijih bitaka koje su se odvijale te sudbonosne 1992. godine, bitka koje se moramo sjećati zbog velikog broja poginulih. Danas, smo tužni, ali smo ponosni na one koji su dali živote i iskažimo uvijek poštovanje prema tim ljudima i njihovim porodicama” dodao je između ostalog Omerović. Potom su delegacije obišle mezarje Kovači-Hradnica, proučen je jasin na mezarju Kovači-Hrasnica. Preživjeli učesnici bitke za Famos, kao i članovi porodica poginulih, ističu da je to bila jedna od najtežih bitaka za odbranu Bosne i Hercegovine i Sarajeva. Naglašavaju njen ključni značaj, jer je onemogućeno srpskim snagama da prodru na slobodnu hrasničku teritoriju, te krenu dalje ka Ilidži i Sarajevu.

## Odata počast herojima

U okviru obilježavanja 26. godišnjice formiranja Četvrte viteške motorizovane brigade Armije RBiH, 28. jula 2018. godine položeno je cvijeće na mjesto pogibije Emira Bogunića Čarlija, sestara Samire i Mevlide Elčić Džemala Bublina na Golom brdu na Igmanu. Učenjem Fatihe odata je počast ovim hrabrim braniocima, a održan je i historijski čas na kojem se govorilo o njihovim herojskim podvizima. Nakon polaganja cvijeća na Golom brdu, članovi porodica poginulih i saborci položili su cvijeće na mezare Emira Bogunića Čarlija i Ejuba Sarajkića Eke ispred Doma kulture u Hrasnici.





## Sajam meda i pčelinjih proizvoda

U organizaciji Udruženja pčelara „Behar“ Ilidža, od 9. do 13. jula 2018. godine u ulici Rustempašina na Ilidži održan je sajam meda i pčelinjih proizvoda. Na sajmu je svoje proizvode izložilo 10 pčelara iz ovog udruženja. Proizvođači su istakli da su cijene povoljne, a med kvalitetan kojeg ove godine ima znatno manje. Sajam je bio izložbeno-prodajnog karaktera. Osim pčelinjih, izloženi su bili i domaći proizvodi od voća, te razne prirodne kreme za kožu.



## Skauti iz Italije na Ilidži

U gostima Odreda izviđača “Vrelo Bosne” Ilidža 19. i 20. augusta 2018. godine, bili su skauti-izviđači iz Italije-Torino.

“Imali smo vrlo srdačno i korisno druženje, te uspostavili vezu za naše buduće susrete.

Na obali Željeznice, podigli smo šatore i tu smo zajednički proveli noć. Na ovaj način, dali smo svoj doprinos Euro-izviđačkoj-skautskoj organizaciji, “rekao nam je Bedro Mujić iz Odreda izviđača “Vrelo Bosne.”

## Velež pobjednik Trećeg memorijalnog turnira “Četvrta viteška brigada”

Fudbaleri Veleža pobjednici su Trećeg memorijalnog turnira “4. Viteška” koji je za vikend održan na stadionu Famos u Hrasnici. Najboljim igračem turnira koji se igrao u sklopu obilježavanja “Dana 4. Viteške motorizovane brigade” proglašen je igrač Veleža Mehmed Ćosić, najbolji strijelac je njegov klupski kolega Edin Vehabović koji je bio i strijelac trećeg gola u finalu, dok je najboljim golmanom proglašen golman Veleža Adnan Bobić.

“Na turniru je prikazan kvalitetan fudbal i vrlo smo zadovoljni posjetom, tribine su na finalnoj utakmici i pored velikog pljuska, koji je obilježio njezin početak, bile prepune. Učešće klubova, među kojima i mostarskog Veleža govori, dovoljno o kvaliteti sada već tradicionalnog turnira koji je i ove godine organizovan na visokom nivou” izjavio je Mujo Tutun, predsjednik FK Famos.

“Dani 4. Viteške motorizovane brigade”, kojim se obilježava 26. godišnjica formiranja jedinice koja je tokom agresije na Bosnu i Hercegovinu čuvala Hras-

nicu, Sokolović Koloniju, Butmir, slobodne teritorije Ilidže i područje Igmana, a time i “Kapiju Sarajeva” počeli su u petak revijalnom odbojkaškom utakmicom OK Čarli i OK Ilidža, a nastavljaju se 27. jula otkrivanjem spomen - obilježja brigade, svečanom sjednicom OV Ilidža, te Hatma dovom i tevhidom šehidima.





## Košarkaški kamp „Košarka bez granica“

**K**ošarkaški klub Ilidža koji je svoj rad bazirao sa najmlađim uzrastom, od 28. juna do 4. jula 2018. godine na Bjelašnici organizovao je košarkaški kamp „Košarka bez granica“. Dječaci i djevojčice iz Kantona Sarajevo i regije, njih 50 proveli su sedam nezaboravnih dana košarke i druženja na otvorenim terenima ZOI 84 sa smještajem u Hotelu Han. Sa djecom je radilo sedam trenera, a pridružili su im se i dva izuzetna mlada košarkaša Sani Čampara i Adnan Arslanagić koji su sa djecom i roditeljima podijelili svoja košarkaška iskustva. U sklopu kampa, košarkašima i košarkašicama doc.dr. Arzija Pašalić sa Fakulteta zdravstvenih studija Univerziteta u Sarajevu održala je zanimljivo predavanje o značaju pravilne ishrane mladih sportista. Pored treninga i završnog takmičenja bilo je šetnje, planinarenja, druženja, zabavnih kvizova, ali i ugodne hotelske atmosfere i dobre hrane, a organizovano je i takmičenje za roditelje. Svi su se izvrsno zabavljali.

## Uspjeh boćara Napretka

**U**organizaciji Boćarskog kluba „Napredak-Wila“ Ilidža, 25. i 26. avgusta 2018. godine na terenu na Stupu održano je prvenstvo Bosne i Hercegovine u boćanju u disciplini precizno izbijanje. Na prvenstvu su nastupili boćari iz boćarskih klubova Bura iz Posušja, Neuma, Čapljine, Ljubuškog, Gruda, Zrinskog i Ante Rozić iz Mostara, te boćari Banja Luke, Širokog Brijega, Dračeva i Napretka. Nakon finalne serije najbolji je bio Mate Grubišić iz BK Bura sa 16 pogodaka, drugo mjesto sa 13 pogodaka podijelili su boćari Napretka Drago Dadlak i Osman Ganić, dok je treće mjesto zauzeo Draženko Čuk takođe iz BK Napredak.

Pored ovog uspjeha boćari Napretka Osman Ganić i Drago Dadlak osvojili su treće mjesto na prvenstvu BiH u disciplini par-klasično koje je nedavno održano u Čapljini.

## Bajramski turnir u šahu

**U**organizaciji Šahovskog kluba „Igman“, 19. avgusta 2018. godine u prostorijama kluba u prostorijama MZ Hrasnica I, a povodom Kurban-bajrama, održan je turnir u šahu. Na turniru je učestvovalo 13 igrača sa Ilidže koji su igrali po Bergerovom sistemu svako sa svakim 10 minuta po igraču, a odigrano je 12 kola. Prvo mjesto osvojio je Eldin Bučan sa osvojenih 10 poena, drugo Nedžad Dedić sa 9,5 i treće mjesto Džeko Škrijelj sa osvojenih 9 poena. Pobjednicima su uručene prigodne nagrade. Sudija i tehnički organizator turnira bio je Kemal Bajramović.

## Podijeljena 52 bajramska paketića

**Z**a 52 djece bez roditelja sa područja općine Ilidža, ovaj Bajram „Zlatna ruka“ izmamila je novi osmijeh na njihova lica, jer mnogi ljudi, baš u tim trenucima, žele podijeliti radost ovog praznika sa onima kojima je takav oblik pažnje vjerovatno najpotrebniji.

“Ako smo ih bar malo usrećili, postigli smo cilj” rekla nam je Zlata Dizdarević iz Udruženja „Zlatne ruke“, te zahvalila Braći Mujić na donaciji slatkiša čime se obogatilo paketić.





## Odbojkašice Igmana osvojile "Ilidža Volleyball Cup 2018"

U dvorani KSC "Sabit Hadžić" održan je sedmi po redu, turnir u ženskoj odbojki "Ilidža Volleyball Cup 2018". Na turniru su učestvovalе ekipe: HŽOK "Smeč" iz Širokog Brijega, OK "Slavija" iz I. Sarajeva, OK "Ilidža" iz Ilidže i ŽOK "Igman Ilidža" iz Ilidže.

Nakon polufinalnih susreta ŽOK "Igman Ilidža" - OK "Slavija" 3:2 i OK "Ilidža" - HŽOK "Smeč" 3:1 u borbi za 3. mjesto OK "Slavija" je bila bolja od HŽOK "Smeč" i sa rezultatom 3:0 osvojila 3. mjesto. U finalnoj utakmici bolja je bila ekipa ŽOK "Igman Ilidža" koja je sa 3:1 savladala OK "Ilidža".

Tako da je na turniru prvo mjesto pripalo ŽOK "Igman" Ilidža, drugo OK "Ilidža", treće OK "Slavija" i četvrta ekipa HŽOK "Smeč."

Za najboljeg primača turnira proglašena je Oro Ana iz OK "Slavija".

Nagrade za najboljeg libera i korektora su primile igrāčice OK "Ilidža" Zorlak Amina i Pita Naida. Igračica ŽOK "Igman Ilidža" Merima Hadžić je proglašena za najboljeg blokera. Za najboljeg tehničara je izabrana Ganić Majra iz ŽOK "Igman Ilidža", a njena kolegica Bahić Mirha je proglašena za najbolju igrāčicu turnira. Nagradenim pojedincima i ekipama pehare je uručio predstavnik kluba Hadžić Dino. Kao i do sada, veliku pomoć u organizaciji ovog turnira je pružila Općina Ilidža.